

歷代職官表

冊  
七

歷代職官表

卷一





|     |     |   |      |
|-----|-----|---|------|
| 士   | 醫   | 目 | 吏    |
|     |     |   |      |
|     |     |   |      |
|     | 長醫工 |   |      |
|     |     |   |      |
|     |     |   | 正太醫  |
|     |     |   | 助太醫  |
|     |     |   | 教太醫  |
|     |     |   |      |
|     | 主藥  |   | 上士   |
|     | 下士  |   | 中士   |
|     | 藥署主 |   | 下士   |
|     | 主醫  |   | 教士   |
|     | 藥局主 |   | 助醫   |
| 藥署主 | 醫局司 |   | 士醫   |
| 主醫  | 藥局主 |   | 教醫   |
|     |     |   | 助醫   |
|     |     |   |      |
|     |     |   | 授局太醫 |
|     |     |   | 教太醫  |
|     |     |   |      |
|     | 長行  |   | 勾院太醫 |
|     | 太醫  |   | 管院太醫 |
|     |     |   | 歷院太醫 |
|     |     |   | 事院太醫 |
|     |     |   | 都院太醫 |
|     |     |   | 目院太醫 |
|     |     |   | 吏院太醫 |

醫

員

員醫

醫佐

生署太工署太佐局尙  
醫醫醫醫醫藥

學三醫九  
生科生科

生科十三  
醫醫

珍做宋版印

太醫院

國朝官制

太醫院院使漢人一人

正五品

左右院判漢人各一人

正六品

掌醫之政令率其屬以供醫事員額順治元年定

御醫十有五人

初定正八品雍正七年升爲七品用六品冠帶

吏目三十人

八品十五人九品十五人

醫士四十人

用從九品冠帶醫員三十人

以上俱漢人員額

掌九科之法以治疾曰大方脈小方脈傷寒科婦人科瘡瘍科鍼灸科眼

科口齒科正骨科自院使至醫士皆以所業專科分班侍直給事宮中者

曰宮直給事外廷者曰六直宮直於各宮外班房六直於東藥房各以其

次更代供使令焉順治元年初設御醫十人吏目三十人豫授吏目十人

醫士二十人十八年省吏目二十人並省豫授吏目員額康熙九年復置

吏目豫授吏目各十人十四年省吏目十人三十一年又省豫授吏目六

十一年增置醫士二十人雍正元年復增置吏目十人改豫授吏目爲吏

目七年增御醫五人八年吏目改爲八品九品者各十五人增置食糧醫員三十人又有效力醫生無定員掌灸製之法以治藥院使攷其術而進退之又設教習廳簡御醫吏目之能者二人爲教習以課醫人習醫焉

歷代建置

三代

〔周禮天官〕醫師上士二人下士四人府二人史二人徒二十人掌醫之政令聚毒藥以供醫事凡邦之有疾病者有庀瘍者造焉則使醫分而治之歲終則稽其醫事以制其食十全爲上十失一次之十失二次之十失三次之十失四爲下

鄭康成注醫師衆醫之長

食醫中士二人掌和王之六食六飲六

膳百羞百醬八珍之齊凡食齊眡春時羹齊眡夏時醬齊眡秋時飲齊眡冬時凡和春多酸夏多苦秋多辛冬多鹹調以滑甘凡會膳食之宜牛宜稌羊宜黍豕宜稷犬宜粱雁宜麥魚宜菰凡君子之食恆放焉疾醫中士八人掌養萬民之疾病四時皆有癘疾春時有瘡首疾夏時有痒疥疾秋

時有瘡寒疾冬時有嗽上氣疾以五味五穀五藥養其病以五氣五聲五色眡其死生兩之以九竅之變參之以九藏之動凡民之有疾病者分而治之死終則各書其所以而入于醫師瘍醫下士八人掌腫瘍潰瘍金瘍折瘍之祝藥副殺之齊凡療瘍以五毒攻之以五氣養之以五藥療之以五味節之凡藥以酸養骨以辛養筋以鹹養脈以苦養氣以甘養肉以滑養竅凡有瘍者受其藥焉獸醫下士四人掌療獸病療獸瘍凡療獸病灌而行之以節之以動其氣觀其所發而養之凡療獸瘍灌而副之以發其惡然後藥之養之食之凡獸之有病者有瘍者使療之死則計其數以進退之

〔漢書藝文志〕方技者皆生生之具王官之一守也太古有岐伯俞拊中世有扁鵲秦和蓋論病以及國原診以知政

謹案漢書司馬相如傳詔岐伯使尙方注引張揖曰岐伯者黃帝太醫屬使主方藥也徐堅初學記引郭璞巫咸山賦序曰巫咸以鴻術爲帝

堯之醫是太醫之職由來已久故班固以爲王官之一守特至周而其制始備耳又周禮所載王與卿大夫則醫師治之而疾醫但稱掌養萬民之疾病其職似亦有差等然疾醫僅中士八人必不能徧治萬民之疾當必大且危者然後醫士治焉其餘則受方於醫師而未列職者皆使分治殆如今民閒之醫聽其自行治療而不必盡官領之歟

秦

〔杜佑通典〕秦有太醫令丞主醫藥

〔史記扁鵲列傳〕秦太醫令李醯

〔史記刺客列傳〕侍醫夏無且

謹案左傳載春秋時良醫如和緩之類皆出於秦是秦人多工醫術故其設官亦備據刺客傳所記是令丞以外尙有侍醫主提藥囊在殿上侍立蓋卽如今之御醫也

漢

〔漢書百官志公卿表〕奉常屬官有太醫令丞

〔應劭漢官儀〕太醫令周官也秩千石丞三百石

〔後漢書桓譚傳〕董賢風太醫令真欽使求傅氏罪過

〔漢書王嘉傳〕侍醫伍宏等侍內案脈

〔漢書貢禹傳〕侍醫臨治〔顏師古注〕侍醫天子之醫也

〔漢書藝文志〕侍醫李柱國校方技

〔漢書百官公卿表〕少府屬官有太醫令丞

〔太平御覽〕少府太醫令丞無員多至數千人

〔王應麟玉海〕少府有太醫令太常復有令丞蓋禮官之太醫司存之所

少府之太醫通乎王內

〔漢書外戚傳〕上官桀妻父所幸充國爲太醫監

謹案西漢太醫令丞有二一屬太常一屬少府史不言其分置之由以

王應麟所言核之其屬太常者蓋如今太醫院之職其屬少府者則如

今藥房官之隸於內務府也至侍醫乃承秦舊稱當卽今之御醫而王嘉傳之侍醫伍宏董賢傳又稱爲醫待詔疑爲一官而兩名又李柱國亦侍醫而隋書載其官又作太醫監疑亦以侍醫遷爲此職如今御醫升補院判之比又外戚傳有女醫淳于衍得入宮侍皇后疾因搗附子合太醫大丸以飲皇后霍光傳則稱爲乳醫淳于衍師古曰視產乳之疾者殆漢時又有此等女醫同隸於太醫令以備諸科之一特史未詳其制耳

〔後漢書百官志〕太醫令一人六百石掌諸醫藥丞方丞各一人藥丞主藥方丞主方右屬少府

〔劉昭後漢志注〕漢官曰員醫二百九十三人員吏十九人

〔通典〕漢有醫丞有醫工長

〔徐堅初學記〕司馬彪續漢書曰東平王蒼到國病詔遣太醫丞將高手

醫視病

〔後漢書方術傳〕郭玉和帝時爲太醫丞

〔裴松之三國志注〕魚豢魏略曰脂習除太醫令與孔融親善

〔太平御覽〕典論曰中常侍張讓子奉爲太醫令

〔後漢書蓋勳傳〕京兆高望爲尙藥監

謹案東漢太常屬官無太醫令惟少府有之蓋視西京舊制已有減省而尙藥監一官百官志亦不載當卽西漢之太醫監也

〔史記倉公列傳〕齊太醫先診病

謹案倉公傳有齊太醫又有齊王侍醫蓋漢世諸侯王國其設官多準天朝今並附識於此又據劉昭補志注引漢官所載當時百官府皆有官醫員額疑其人雖分隸諸司而考選補用當亦由太醫主之自唐以後其法久廢惟今刑部設醫士二人由院簡送六歲一更更之日稽其醫事之優劣優者升吏目劣者斥之似與漢制頗爲相近云

### 三國

〔通典〕漢太醫令丞屬少府魏因之

晉

〔晉書職官志〕宗正統太醫令史及渡江哀帝省并太常太醫以給門下省

〔通典〕太醫令晉銅印墨綬進賢一梁冠絳朝服而屬宗正

謹案晉書太醫令史疑當作令丞蓋傳刻有譌據愍懷太子傳有太醫令程據是晉制實沿漢魏之舊不應僅設令史也

宋齊梁陳

〔宋書百官志〕太醫令一人丞一人隸侍中

〔南齊書百官志〕太醫令一人丞一人屬起部亦屬領軍

〔司馬光資治通鑑〕齊明帝建武元年海陵恭王有疾遣御師瞻視〔胡三省注〕御師醫師也以其供御故謂之御師

謹案南齊太醫屬起部及領軍與宋制不同杜佑以爲宋齊俱隸侍中

者誤至御師之稱百官志不載蓋卽太醫令所屬諸醫當如今之御醫也

〔隋書百官志〕梁門下省置太醫令又太醫二丞中藥藏丞爲三品勳位  
〔冊府元龜〕尙藥自梁以降皆太醫兼其職陳如梁制

〔北史姚僧垣傳〕僧垣仕梁爲太醫正

謹案梁之太醫正不見於百官志當是太醫令屬官殆天監以後始置  
史所載皆其初定之制故未之及耳其後隋大業中於太醫署置正十  
人蓋亦承梁制而設也

### 北魏

〔魏書官氏志〕太醫博士從第七品下太醫助教從第九品中

〔魏書藝術傳〕周澹善醫藥爲太醫令李修爲前軍將軍領太醫令

〔魏書徐謩傳〕轉右軍將軍侍御師

〔魏書王顯傳〕顯以醫術自通召補侍御師累遷廷尉少卿仍在侍御營

進御藥

〔胡三省通鑑注〕醫師侍御左右因以名官後魏之制太醫令屬太常掌醫藥而門下省別有尙藥局侍御師蓋今之御醫也

謹案北魏太醫令復隸太常而門下省又有尙藥局與漢之少府屬官別置太醫令者其制相合嗣後歷代多因之今太醫院專掌醫事而內務府亦有內藥房主事庫掌等員同司治藥亦卽此例但醫官通乎王內其職守本屬相資並無區別今故併繫於此而仍互見於內務府篇云

北齊

〔冊府元龜〕北齊門下省統尙藥局有典御二人侍御師四人尙藥監四人總御藥之事

〔隋書百官志〕後齊尙藥局丞二人中侍中省有中尙藥典御及丞各二人

〔鄭樵通志〕北齊曰太醫令丞

〔隋書百官志〕後齊太常屬官有太醫令丞

〔北史藝術傳〕齊大寧二年徐之才弟之範爲尚藥典御又有尚藥典御

鄧宣文

後周

〔通典〕後周官品正四命天官太醫小醫等下大夫正三命天官小醫醫正瘍醫等上士正二命天官醫正瘍醫等中士正一命天官主藥醫正瘍醫等下士

〔孫逢吉職官分紀〕後周有主藥六人

〔隋書姚僧垣傳〕周大象二年除太醫下大夫

隋

〔隋書百官志〕高祖受命置門下省統尚藥局典御二人侍御醫直長各四人醫師四十人太常統太醫署令二人丞一人太醫署有主藥二人醫